

Inatsisissatut siunnersuummut oqaaseqaatit

Nalinginnaasumik nassuiaatit

1. Aallaqqaasiut

Maannakkut Qaasuitsup Kommunerisaani ulloq 25. marts 2014-imi innuttaasunik taasisitsinermi Qaasuitsup Kommuniata kommuninut nutaanut arlalinnit avinneqarnissaa qinersisartut amerlanerussuteqarluinnartut kissaatigaat. Kommunip avinneqarnerata kingunissai innuttaasunik taasisitsinnginnermi naammattumik nassuiarneqarnikuunngitsut Naalackersuisut isumaqarmata, kommunip avinneqarnerani allaffissornikkut aningaasatigullu kingunissai pillugit siunnersortit nalunaarusiaat marluk tamatuma kingorna suliarineqarput.

Maannakkut kommuniusoq kommuninut marlunnut nutaanut namminersortunut avinneqassasoq Qaasuitsup Kommuniani kommunalbestyrelsi isumaqatigiittoq tamatuma kingorna Naalackersuisunut inassuteqarpoq. Kommunalbestyrelsip aalajangiinera pillugu kommunip saaffiginnissutaa Naalackersuisut ulloq 1. juli 2016-imi tiguaat.

Qaasuitsup Kommunianik avitsinissamut tunngaviit piumasarineqartut pissarsiariniarlugit inatsisissaatut siunnersuut manna Naalackersuisunit saqqummiunneqarpoq. Siunnersuummiippot Qaasuitsup Kommuniani kommuninut nutaanut marlunnut avinneqarnissaa, ikaarsaariarnermi ataatsimiititalianik qinersinissamut inissititerinissamullu, ikaarsaariarnermi ataatsimiititaliat suliassaat aningaasalersornissaallu pillugit aalajangersakkat kiisalu avitsinerup sulisutigut aningaasaqarnikkullu kingunissai.

Siunnersuutigineqarpoq Qaasuitsup Kommuniani ikaarsaariarnermi ataatsimiititalianut marlunnut ulloq 4. april 2017-imi qinersisoqassasoq. Qinersineq pillugu inatsit atuuttoq malillugu qinersineq taanna ingerlanneqassaaq. Tamatumanili Qaasuitsup Kommuniani kommunalbestyrelsimut qinersisoqassanngilaq. Taamaattumik maannakkut kommunalbestyrelsip piffissaq atuuffia ulloq 31. december 2017-imut sivitsorneqarnissaa siunnersuutigineqarpoq.

Piffissami 1. maj 2017-imiit 31. december 2017-imut ikaarsaariarnermi Qaasuitsup Kommuniani marlunnik ikaarsaariarnermi ataatsimiititaliaqassaaq ataatsimillu kommunalbestyrelseqassalluni.

Ulloq 1. januar 2018 kommunit taakku marluk pilersinneqassapput ikaarsaariarnermilu ataatsimiititaliat kommunalbestyrelsitut atuutilissallutik.

Kiisalu siunnersuutigineqarpoq kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu Inatsisartut inatsisaat ikaarsaariarnermi ataatsimiititalianik

qinersinermi atorneqassasoq. Taamaaqataanik ikaarsaariarnermi ataatsimiititaliat sulinerannut pisariaqartutigit tulluarsarlugu kommunini aqutsineq pillugu Inatsisartut inatsisaat atorneqassalluni. Tamatumunnga pissutaavoq siunnersuutigineqarmat ikaarsaariarnermi ataatsimiititaliaq 1. januar 2018-imiit kommunini nutaani taakkunani kommunalbestyrelsinnngornissaat.

2. Siunnersuutip imarisai pingaarnerit

Qinersineq

Ikaarsaariarnermi ataatsimiititalianut ulloq 4. april 2017 qinersisoqassasoq siunnersuutigineqarpoq. Qinersinissat taakku pillugit aalajangersakkat erseqqinnerusut siunnersuummi kapitalit aappaanni aalajangersarneqarput.

Ikaarsaariarnermi ataatsimiititalianut Qaasuitsup Kommuniani qinersisoqassaaq, tassani qinigassanngortitsineq, qinersinermi allattuivinnik qinersinermilu siulersuisunut akuersineq kiisalu qinersinermi kisitsineq qinersisarneq pillugu inatsimmi aalajangersakkat atuuttut malillugit ingerlanneqassallutik. Qinigassanngortitsinermi, qinigassanngortitanik akuersinermi, qinersinerup ingerlanneqarnerani qinersinernillu kisitsinermi aamma qinigaasinnaanermik misissuinermik suleriaatsit aamma ikaarsaariarnermi ataatsimiititalianut qinersinermi atorneqassapput.

Ikaarsaariarnermi ataatsimiititaliamut sorlermut qinigassanngortittut ataasiakkaat qinigassanngortinnissaannut qinigaasinnaanerannullu qinigassanngortittut pillugit inuit allattorsimaffiani najukkatut nalunaarsorneqarsimasoq aalajangiisuusaaq. Taamaaqataanik ikaarsaariarnermi ataatsimiititaliamut sorlermut taasisinnaanermut atuutissalluni.

Maannakkut kommunalbestyrelsiusup piffissaq atuuffia 31. december 2017 tungaanut qaammatinik arfineq pingasunik sivitsorneqassaaq. Ikaarsaariarnermi ataatsimiititaliat piffissaq atuuffiat tassaassaaq 1. maj 2017-imiit 31. december 2017-imut. Ikaarsaariarnermi ataatsimiititaliat tamassuma kingorna kommunini nutaani taakkunani kommunalbestyrelsinnngussapput. Kommunini nutaani taakkunani kommunalbestyrelsinut ileqqusumik qinersineq siullesq apriilimi 2021-imi pissaaq.

Ikaarsaariarnermi ataatsimiititaliat

Siunnersuummi kapitalit pingajuat ikaarsaariarnermi ataatsimiititaliat taakku marluk pillugit aalajangersakkanik imaqarpoq.

Ikaarsaariarnermi ataatsimiititaliat kommunit nutaassat piareersarneqarneranni pingaaruteqartumik suliassaqassapput. Ikaarsaariarnermi ataatsimiititaliat Qaasuitsup Kommuniata inaarutaasumik avinneqarnissaata tungaanut piffissami ikaarsaariarfimmi atuutissapput.

Ikaarsaariarnermi ataatsimiititaliani ilaasortat amerlassusissaat kommuninut allanut naleqqiullugit tulluarsarneqassapput, kommunilu 1 17-inik ilaasortaqaqassalluni aamma kommuni 2 15-inik ilaasortaqaqassalluni. Amerlassutsit kommunini nutaani taakkunani innuttaasut tunngaviusut aallaavigalugit missiliorneqarput.

Ikaarsaariarnermi ataatsimiititaliat kommunit aqunneqarnerat pillugu Inatsisartut inatsisaanni tamanna pillugu aalajangersakkat atuuttut malillugit inissitsitsissapput.

Siunnersuutigineqarpoq ikaarsaariarnermi ataatsimiititaliami ilaasortaqaq utoqqaaneq inissitsiterluni ataatsimiinnermut aggersaassasoq. Tamanna kommunit aqunneqarnerat pillugu Inatsisaanni inissitsiterisarneq pillugu aalajangersakkanik saneqqutsineruvoq. Siunnersuutigineqarpoq inissitsiterinermi periaatsimi aqutsineq pillugu aalajangersakkat malinneqassasut, taamaattorli inissitsiterluni ataatsimiinneq kingusinnerpaamik ulloq 1. juni 2017-imi naammassineqarsimassalluni.

Ikaarsaariarnermi ataatsimiititaliat borgmesterinik, borgmesterit tulliinik borgmesterillu tulliisa appaannik qinersisarneq pillugu aqutsineq pillugu inatsimmi aalajangersakkat malillugit siulittaasumik, siulittaasup tullianik siulittaasullu tulliata appaannik qinersissapput. Siunnersuutigineqarpoq ikaarsaariarnermi ataatsimiititaliat 1. januar 2018 avitsereernerup kingorna kommunini nutaani kommunalbestyrelsinngussasut. Kommunini nutaani ikaarsaariarnermi siulittaasut borgmesteritut, siulittaasut tullii borgmesterip tulliatus siulittaasullu tulliisa appaat borgmesterip tulliata appaatut ingerlaqqissapput.

Siunnersuutigineqarpoq ikaarsaariarnermi ataatsimiititaliani ilaasortat kommunalbestyrelsit akissarsiaat pillugit aqutsineq pillugu inatsimmi aalajangersakkat malillugit akissarsiaqassasut. Taamaaqataanik siunnersuutigineqarpoq siulittaasoq, siulittaasup tullia siulittaasullu tulliata appaa borgmesterit, borgmesterit tulliisa borgmesterillu tulliisa appaata akissarsiaat pillugit aalajangersakkat malillugit akissarsiaqassasut.

Pisussaaffiit/piginnaatitaaffiit

Ikaarsaariarnermi ataatsimiititaliat pisussaaffii pisinnaatitaaffiilu siunnersuummi kapitalit sisamaanni malittarisassaliorneqarput.

Siunnersuutigineqarpoq ikaarsaariarnermi ataatsimiititaliat sulinerat kommunimi aqutsineq pillugu Inatsisartut inatsisaanni aalajangersakkat pisariartumik naleqqussarneri naapertorlugit ingerlanneqassasoq.

Ikaarsaariarnermi ataatsimiititaliat pingaarnertut suliassarissavaat Qaasuitsup Kommuniata avinneqarnissaata piareersarnissaa kiisalu kommunit marluk nutaat taakku pilersinnissaasa ingerlanneqarnissaasalu aqqissuunnerat, taamaalillutik kommunit marluk nutaat taakku

kommunit oqartussaasutut akissussaanerat 1. januar 2018-miit aarlerinangitsumik ingerlassinnaalerlugu.

Taamaattumik siunnersuutigineqarpoq ikaarsaariarnermi ataatsimiititaliat siulliit ilaattut aningaasaqarnermut ataatsimiititalianik ataatsimiititalianillu pisariaqartunik allanik pilersitsissasut. Kommunit aqunneqarnerat pillugu Inatsisartut inatsisaanni aalajangersakkat tassani taamatutaaq atuutissapput. Aammattaaq ikaarsaariarnermi ataatsimiititaliat kommunini nutaani taakkunani aqutsinermi malitassanik kiisalu ikaarsaarnermi ataatsimiititaliat sulinerannut suleriaasissanik aalajangersaassapput.

Ikaarsaariarnermi ataatsimiititaliat kommunit nutaat aqqi illoqarfiillu ilisarnaataat kingusinnerpaamik 1. august 2017-imi isummerfigissavaat. Kommunit aggornerat pillugu Inatsisartut inatsisissaata nutaap Inatsisartut 2017-imi ukiakkut ataatsimiinneranni suliarineqarnissaa eqqarsaatigalugu taamatut aalajangernerup piaartumik isumagineqarnissaa pingaaruteqarpoq.

Aammattaaq ingerlatsiviit siunissami sumi inissisimanissaat aalajangerneqassaaq. Ingerlatsiviit sumiiffimmi ataatsimi pinngitsooratik inissinneqartariaqanngillat, kommuninili nutaani illoqarfinnut agguanneqarsinnaallutik. Ikaarsaariarnermi ataatsimiititaliat ingerlatsiviit ataasiakkaat inissisimaffii pillugit aalajangiissapput, soorlu aamma ikaarsaarnermi ataatsimiititaliat kommunimi nutaami allaffeqarfik piareersassagaat, allaffeqarfimmillu ineriartortitsisussanik allaffissornermi aqutsisunik pisariaqartumik amerlassusilinnik atorfinitsitsissallutik. Naatsorsuutigineqarpoq suliaq tamanna kommunit avinneqarnerat 1. januar 2018 piviusunngortinneqartinnagu naammasseriissasoq.

Sulisut

Sulisut aqqissuussaanerup allangortinneqarneranik ingerlaannaq kalluarneqartussat atorfeqarnermi atugaat siunnersuutip kapitalit tallimaanni malittarisassiuunneqarput.

Aallaaviusumik sulisut suliassat malissavaat.

Aalajangersarneqarpoq tjenestemand-it atorfeqarnermi maannamut atugassaritinneqartut assigisaat atorlugit kommunini nutaani atorfinitsinneqassasut.

Sulisut isumaqatigiissutit naapertorlugit immikkulluunniit atugassaritinneqarluni atorfeqartut maannamut kommunerisimasami atugassaritinneqartut assingi atorlugit suliassatik suliariinnarlugit nuunnissamik neqeroorfigineqassapput. Nuunnissaq imatut siusitsigisukkut nalunaarutigineqassaaq sulisut soraarniuteqarnissamik nalunaaruteqarnissamut piffissaritinneqartut nalinginnaasut atorlugit nuunnginnermi soraarniuteqarnissamut periarfissaqartillugit.

Kommunini nutaani siunissami ingerlatsivissat inissaannik ikaarsaariarnermi ataatsimiititaliat isummereerpata atorfeqartut kikkut sumi inissinneqassanersut pillugit sapinngisamik piaarnerpaamik pilersaarusiortariaqarput. Atorfeqartut pilersaarutit pillugit ingerlaavartumik ilisimatinneqartassapput, aamma atorfeqartup suliffigisaanik nuussineq sapinngisamik siusissukkut nalunaarutigineqassalluni atorfeqartoq ileqquusumik soraarnissamik kalerriinissaq atorlugu suliffimminit soraarnissaminut periarfissaqarluni, atorfeqartoq suliassaq peqatigalugu nuukkusunngippat.

Aningaasaqarneq, missingersuutit, naatsorsuutit kukkunersiui nerlu

Aningaasaqarneq il.il. pillugit aalajangersakkat kapitalimi matumani nassaarineqarsinnaapput.

Aallarniutigalugu siunnersuutigineqarpoq ikaarsaariarnermut ataatsimiititaliamut aningaasartuutit Qaasuitsup Kommunianit akilerneqassasut, kisiannili tassunga atatillugu ikaarsaariarnermi ataatsimiititalianut tapiissutit naatsorsornerinut aningaasartuutillu akilernissaannut malittarisassanik Naalakkersuisut aalajangersaasinnaallutik. Aammattaaq ikaarsaariarnermi ataatsimiititalianut marlunnut taakkununnga atorneqarsinnaasumik Qaasuitsup Kommunia akeqanngitsumik allaffissornikkut ikiuissasoq.

Siunnersuutigineqarpoq ikaarsaariarnermi ataatsimiititalianut tamanut siulittaasoq kingusinnerpaamik 1. juli 2017-imi ikaarsaariarnermi ataatsimiititaliamut missingersuummut siunnersuusiortuluni saqqummiussissasoq, kingusinnerpaamik ulloq 1. august 2017-imi akuerineqarsimasussaq. Kommunit missingersuusiortarnerat pillugu aalajangersakkat atuuttut taamaaqataanik ikaarsaariarnermi ataatsimiititaliamit atorneqassapput.

Ikaarsaariarnermi ataatsimiititaliaq kukkunersiui neramik paasisimasalik kina 2017-imut ikaarsaariarnermi ataatsimiititaliap naatsorsuutaanik kukkunersiui ssanersaq ikaarsaariarnermi ataatsimiititaliaq kingusinnerpaamik 1. august 2017-imi aalajangiissaaq. Kommunit kukkunersiui nerat pillugu aalajangersakkat atuuttut taamaaqataanik atorneqassapput. Siunnersuutigineqarpoq ikaarsaariarnermut ataatsimiititaliamut 2017-imut naatsorsuutit kommunini pineqartuni nutaani kommunalbestyrelsinut aningaasaqarnermut ataatsimiititaliamit saqqummiunneqassasut, taamaalilluni naatsorsuutit kingusinnerpaamik 1. juni 2018-imi kukkunersiui sumut tunniunneqarsinnaallutik.

Kommuninut nutaanut pineqartunut marlunnut 2018-imut missingersuutit ikaarsaariarnermi ataatsimiititaliamit akuerineqassapput. Kommunit missingersuusi ornerat pillugu aalajangersakkat atuuttut taamaaqataanik atorneqassapput.

Qaasuitsup Kommunianut tapiissutigineqartartut naligiissaariner nullu aqqissuussinerit aqutigalugit aningaasat pissarsiarineqartartut iluani missingersuusi ortoqarnissaa aallaavigineqarpoq, taamaasiornikkut missingersuutit "nutaat" marluusut kommuninut allanut nunatta karsianullu ajortumik kinguneqartussanngorlugit suliarineqaqqunagit.

Kommunit nutaat taakku siunissami ingerlatassaasa qaffasissusiat pillugu pingaarnertigut politikkit piffissami piareersarfiusumi aamma 1. januar 2018 nallertinnagu ikaarsaariarnermi ataatsimiititalianit akuerineqassapput.

Qaasuitsup Kommunian kammunalbestyrelsi aningaasaqarnikkut iliuuserisat tamaasa pillugit ikaarsaariarnermi ataatsimiititalianut ingerlaavartumik ilisimatitsisassaaq, tassunga ilanngullugit 2017-imut ilassutitut aningaasaliinerit kiisalu isumaqatigiissutit aamma pisussaaffiit kinguartinneqarsimasut peratarsinnaasullu isumaqatigiissutigineqarsimasut, taamaalilluni ikaarsaariarnermi ataatsimiititaliat sukkasumik kommunit nutaat taakku aningaasaqarnerat pillugu ataatsimut paasisaqarsinnaallutik.

Siunnersuutigineqarpoq kommunit nutaat taakku ulloq 1. januar 2018-imi siusinnerusukkat Qaasuitsup Kommunianiissimasut pisussaaffiit pisinnaatitaaffiillu tamaasa, kiisalu pigisat nalillit akiitsullu tamaasa tigussagaat.

Qaasuitsup Kommuniani pigisanik nalilinnik akiitsunillu naatsorsuineri tunngaviit erseqqissut, kiisalu kommunit nutaat taakku marluk akornanni agguaneq qulakkeerniarlugit siunnersuutigineqarpoq tamanna pillugu malittarisassanik erseqqinnerusunik nalunaarusiornikkut Naalakkersuisut aalajangersaasinnaasut.

Qaasuitsup Kommuniata 2017-imut naatsorsuutai kommunini marlunni nutaani taakkunani aningaasaqarnermut ataatsimiititalianut saqqummiunneqassapput. Kommunini nutaani taakkunani kammunalbestyrelsit naatsorsuutit kukkunersiuisunut saqqummiutissavaat. Kukkunersiuiineq suliffeqarfimmit kukkunersiuisartumit Qaasuitsup Kommunianit toqqarsimasaanit ingerlanneqassaaq.

Aalajangersakkat allat

Naatsorsuutigineqarpoq pisortat ingerlatsinerat pillugu paasitinneqarsinnaatitaaneq pillugu inatsit kiisalu pisortat ingerlatsineranni suliassat suliarineqartarnerat pillugu inatsit ikaarsaariarnermi ataatsimiititaliat sulineranni atuutissasut. Taamaattorli ikaarsaariarnermi ataatsimiititaliat allagaatinik uppersaatinik Qaasuitsup Kommunianit atorfissaqartitsippata, allagaatillu pisortat ingerlatsinerat pillugu paasitinneqarsinnaatitaaneq pillugu inatsit aamma pisortat ingerlatsineranni suliassat suliarineqartarnerat pillugu inatsit naapertorlugit suliffiup iluani atugassaappata, allagaatit ingerlateqqinneranni suliffiup iluani atugassaanerit annaaneqassanngitsoq suliffiup iluani allagaatit pillugit inatsisini taakkunani aalajangersakkat avaqqussinnaanerit siunnersuutigineqarpoq.

Siunnersuutigineqarpoq Qaasuitsup Kommuniani borgmesteriujunnaartussaq, borgmesterip tulliujunnaartussaq aamma borgmesterip tulliatut aappaajunnaartussaq kommunit aqunneqarnerat pillugu Inatsisartut inatsisaanni tamanna pillugu aalajangersakkat atuuttut malillugit piffissami 1. maj 2017 – 31. december 2017 akissarsiaqartinneqassasut. Qaasuitsup

Kommuniani borgmester-i aamma ikaarsaariarnermi ataatsimiititaliamut siulittaasutut toqqarneqassappat taanna marlunnik akissarsiaqartinneqassanngilaq. Tamatumunnga tunngavilersuutigineqarpoq borgmesteritut sulineq ulloq naallugu suliffittut akissarsiaqareertinnera.

Qaasuitsup Kommuniani borgmesterip tullersortaa imaluunniit borgmesterip tullersortaata aappaa aamma ikaarsaariarnermi ataatsimiititaliami siulittaasup tulliatut imaluunniit siulittaasup tulliaata aappaatut toqqarneqarpata marloriaammik akissarsisitsisoqassaaq.

Taamatuttaaq siunnersuutigineqarpoq Qaasuitsup Kommuniani kommunalbestyrelsimut ilaasortat piffissami tassani akissarsiaqassasut. Kommunalbestyrelsimi ilaasortaq ikaarsaariarnermi ataatsimiititaliamut toqqarneqarpat taanna marlunnik akissarsiaqartinneqassaaq.

3. Pisortanut aningaasatigut allaffissornikkullu kingunissai

Siunnersuisarfittut kukkunersuiisarfittullu ingerlatseqatigiiffiup BDO-p Qaasuitsup Kommuniata avinneqarnissaanut tunngatillugu Namminersorlutik Oqartussanut 3. juni 2016-imi allakkiamini nalilerpaa kommunit marluk nutaat taakku pilersinneqarneranni minnerpaamik 15,8 mio. kr.-inik ataasiarluni aningaasartuuteqarnikkut aningaasartuuteqarnerusoqassasoq kiisalu kommunit nutaat ingerlanneqarnerat ukiumut minnerpaamik 9,4 mio. kr.-inik aningaasartuutaanerusassasoq. Aningaasat taakku ilaatigut tassaapput politikkikkut allaffissornikkullu aqutsinermut allaffissornermullu aningaasartuutit.

Qaasuitsup Kommuniani naliliivoq ataasiarluni aningaasartuutit 15,8 mio. kr.-inut inissinneri appasippallaartumik inissinneqarsimasut qularnanngitsumillu qaffasinnerujussuussasut.

BDO naapertorlugu ilanngullugu naatsorsuutigineqartariaqarpoq kommunini marluusuni nutaani sulisussanik piukkunnaatilinnik atorfinitsitsiniarnissaq aammalu sulisorineqareersut sulisoriinnarsinnaanissaat ajornartorsiutaajumaartoq.

Kiisalu Qaasuitsup Kommuniata avinneqarnerata kingunerisaanik arlalinnik aningaasartuuteqarumaartoq, ilaatigut Akileraartarnermut Aqutsisoqarfimmu, akileraartarnermik aaqqissuussinerup ineriartortinnissaa aamma maannakkut akiligassatigut kinguaattoornerit pillugit suliat kommuninut nutaanut agguarneqarnissaat siunertaralugu. Akileraartarnermut Aqutsisoqarfik naliliivoq aningaasat 300.000 kr.-it aamma 500.000 kr.-it missaannik annertussuseqassasut.

4. Inuussutissarsiutinut aningaasatigut allaffissornikkullu kingunissai

Naatsorsuutigineqarpoq suliffeqarfiit, pisartunut arlalinnut tunngatillugu kommuninut ajornannginnerusumik attaveqarsinnaalissasut ilutigalugulu kommunit amerlanerusut suleqatigilertussaassagaat.

Ilutigalugu kommunit nutaat sulisunik piukkunnaatilinnik atorfinitsitsiniarnerminni ajornartorsiuteqassappata kommunit inuussutissarsiuteqartunut sullissinerat ajorteriarsinnaavoq.

5. Pinngortitamut, avatangiisinut innuttaasullu peqqissusiannut kingunissai

Siunnersuut avatangiisinut pinngortitamullu kinguneqassanngilaq innuttaasulluunniit peqqissusiannut kinguneqassanani.

6. Innuttaasunut kingunissai

Naatsorsuutigineqartariaqarpoq siunnersuut inuit qanimut oqartussaaqataanerannut naleqqiullugu pitsaasumik sunniuteqassasoq. Pisuni arlalinni naatsorsuutigineqarsinnaavoq sumiiffinni allaffeqarfiit innuttaasunut ataasikkaanut aamma qaninnerulissasut.

Naatsorsuutigineqartariaqarporli sunniutaa killeqassasoq, tassa allaffeqarfiup annertunersaa isumalluutit pissutigalugit illoqarfimmi ataatsimi inissinneqartariaqassasut naatsorsuutigineqartariaqarmat.

Kommunit nutaat piginnaanilinnik atorfinitsitsiniartarnerat ajornartorsiuteqarfiussappat inuussutissarsiuteqartunut sunniutissat assigalugit kommunit innuttaasunik sullissinerata pitsaassusaa ajorteriarsinnaavoq.

Ilutigalugu kommunini nutaat pilersinnerinut ingerlannerinullu aningaasartuutit qaffariarnerisa kingunerisaanik kommunini nutaani marluusuni maannamut sullisseriaatsit attatiinnarneqassappata akileraarutip qaffattariaqarsinnaanissaa naatsorsuutigineqartariaqassaaq.

7. Kingunissat allat pingaarutilit

Siunnersuut pingaarutilinnut allanut kinguneqartitsinngilaq.

8. Oqartussanik kattuffinnillu il.il. tusarniaaneq

Kommunit sisamat, KANUKOKA, KANUNUPE, Kommunernes revision BDO, Deloitte, GE, SIK, AK, PIP, DJØF, IMAK, ASG, Aningaasaqarnermut Naalackersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik, Aningaasaqarnermut Sulisoqarnermullu Aqutsisoqarfik aamma Kalaallit Nunaanni Biskoppi inatsisissatut siunnersuut pillugu tusarniaaffigineqarsimapput.

Tusarniaanermut allakkiaq ilanngullugu nassiunneqartoq tusarniaanernit akissutigineqarsimasunik tassungalugu tunngatillugu Siulittaasup Naalackersuisoqarfiata oqaaseqaataanik imaqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut.

Siunnersuutigineqarpoq maannakkut Qaasuitsup Kommuniusoq kommuninut marlunnut namminersortunut 1. januar 2018-imi atuutilersumik avinneqassasoq. Kommunit pingasut sinneri allanngussanngillat.

Imm. 2-mut .

Kommuni 1 tassaassaaq siusinnerusukkut Qaanaap Kommuniunikoq, Kommuneqarfik Upernaviunikoq, Ummannap Kommuniunikoq aamma Ilulissat Kommuniunikoq.

Imm. 3-mut

Kommuni 2 tassaassaaq siusinnerusukkut Qeqertarsuup Kommuniunikoq, Qasigiannugit Kommuniunikoq, Aasiaat Kommuniunikoq aamma Kangaatsiap Kommuniunikoq.

§ 2-mut

Imm. 1.-imut

Siunnersuutigineqarpoq ulloq 4. april 2017 Qaasuitsup Kommuniani ikaarsaariarnermi ataatsimiititalianut marlunnut qinersisoqassasoq. Qinersinerit kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu Inatsisartut inatsisaanni tamanna pillugu aalajangersakkat atuuttut naapertorlugit piareersarneqassapput, ingerlanneqassapput kisitsisoqassallunilu.

Imm. 2-mut

Siunnersuutigineqarpoq ulloq 4. april 2017-imi Qaasuitsup Kommuniani kommunalbestyrelsimut qinersisoqassanngitsoq, tassa kommunalbestyrelsip piffissaq suliffissaa 31. december 2017 tikillugu sivitsorneqarmat, tak. § 2, imm. 3.

Imm. 3-mut

Siunnersuutigineqarpoq Qaasuitsup Kommunini kommunalbestyrelsip piffissaq suliffissaa 31. december 2017-imut sivitsorneqassasoq, taamaalilluni ikaarsaariarnermi ataatsimiititaliaq ulloq 1. januar 2018-imi kommunini nutaani taakkunani kommunalbestyrelsitut atuutilerlutik, tak. § 6.

§ 3-mut

Kommunini nutaani marlunni ikaarsaariarnermi ataatsimiititalianut marlunnut kiisalu kommunalbestyrelsinut ilaasortat amerlassusaat aalajangersakkami aalajangersarneqarput. Aalajangersakkami taamaalilluni aalajangersarneqarpoq kommuni 1-imi aamma kommuni 2-

mi ikaarsaariarnermi ataatsimiititaliani ilaasortat 17-iussasut 15-iullutillu. Ikaarsaariarnermi ataatsimiititaliat kommunini nutaani taakkunani 1. januar 2018 kingorna kommunalbestyrelsiussapput nutaat. Ikaarsaariarnermi ataatsimiititaliani marlunni ilaasortat amerlassusaat kommunini nutaani taakkunani marlunni innuttaasut amerlassusaat tunngavigalugit missingiilluni aalajangerneqarput.

§ 4-mut

Imm. 1-imut

Siunnersuutigineqarpoq ikaarsaariarnermi ataatsimiititaliami ilaasortaq utoqqaanersaq inissitsiterilluni ataatsimiinnissamut aggersaassasoq taamaalillunilu ataatsimiinneq sumi ingerlanneqassanersoq pillugu aalajangiissasoq. Kommunit aqunneqarnerat pillugu Inatsisartut inatsisaanni kommunalbestyrelsimi sivisunerpaamik ilaasortaasimasoq tassunga atatillugu pisinnaatinneqarpoq. Ikaarsaariarnermili ataatsimiititaliat inissitsiternerannut atatillugu aalajangersagaq taanna atorneqarsinnaanngilaq. Ikaarsaariarnermi ataatsimiititaliaqarnermik aaqqissuussineq nutajuvoq, ilaasortallu tamarmik taamaammat siullermeertumik qinigaassallutik.

Imm. 2-mut

Ikaarsaariarnermi ataatsimiititaliat kommunalbestyrelsit nutaat assigalugit inissitissapput, takujulli imm. 1, aamma kommunit aqunneqarnerat pillugu Inatsisartut inatsisaanni aalajangersakkat taamatulli atuupput. Ikaarsaariarnermi ataatsimiititaliat kingusinnerpaamik 1. juni 2017 inissititereersimassapput.

Imm. 3-mut

Siunnersuutigineqarpoq ikaarsaariarnermut ataatsimiititaliat inissitsiternissaasa tungaannut isumaqatigiinniarnit ilaasortamit inissitsiterluni ataatsimiinnermut aggersaasumit aqunneqassasut, tassa ilaasortamit utoqqaanersamit, tak. imm. 1.

§ 5-imut

Imm. 1-imut

Siunnersuutigineqarpoq ikaarsaariarnermi ataatsimiititaliani ilaasortat kommunit aqunneqarnerat pillugu Inatsisartut inatsisaanni kommunalbestyrelsini ilaasortat akissarsiaat pillugit aalajangersakkat assingi malillugit akissarsiaqassasut. Ikaarsaariarnermi ataatsimiititaliani ilaasortat 1. januar 2018-imiit kommunalbestyrelsimi ilaasortanngortussaannerat tamassumunnga pissutaavoq. Ikaarsaariarnermi ataatsimiititaliamut ilaasortaq aamma kommunalbestyrelsimut ilaasortaammat, ilaasortaq taakkuninnga marluusunit nalinginnaasumik aningaasarsisassaaq. UKA 2007/30-p aappassaaneerineqarnerani isumaliutissiisummi periusigineqarsimasut innersuussutigineqarput.

Imm. 2-mut

Siunnersuutigineqarpoq siulittaasut, siulittaasut tullii aamma siulittaasut tulliiisa aappaat kommunit aqunneqarnerat pillugu Inatsisartut inatsisaanni borgmesterit, borgmesterit tulliiisa aamma borgmesterit tulliiisa appaasa akissarsiaat pillugit aalajangersakkat atuuttut malillugit akissarsiaqassasut. Taakku 1. januar 2018-imiit borgmesterinngortussaanerat, borgmesterip tullinngortussaanerat borgmesterillu tulliiata aappanngortussaanerat tamassumunnga aamma pissutaavoq.

§ 6-imut

Siunnersuutigineqarpoq ikaarsaariarnermi ataatsimiititaliat kommunini nutaani taakkunani ulloq 1. januar 2018 kommunalbestyrelsinngussasut aammalu aprilimi 2021-mi kommunalbestyrelsinut qinersinissap tulliuuttup tungaanut atuutissasut.

§ 7-imut

Aalajangersakkami aalajangersarneqarpoq ikaarsaariarnermi ataatsimiititaliani siulittaasut 1. januar 2018 kingorna borgmesterit, siulittaasut tullii borgmesterip tulliatut siulittaasullu aappaat borgmesterip tulliiata aappaattut ingerlaqqissasut. Taamaammat taakku kommunit aqunneqarnerat pillugu Inatsisartut inatsisaanni tamanna pillugu aalajangersakkat naapertorlugit qinerneqassapput.

§ 8-mut

Siunnersuutigineqarpoq kommunit aqunneqarnerat pillugu Inatsisartut inatsisaat atuuttoq ikaarsaariarnermi ataatsimiititaliat atuunneranni atuutissasoq.

§ 9-mut

Ikaarsaariarnermi ataatsimiititaliat suliassaat pingaarneq tassaavoq kommunit marluk nutaat taakku piareersarnissaat, aammattaaq Qaasuitsup Kommuniata illersorneqarsinnaasumik atorunnaarsinnissaa qulakkiissallugu. Kommunit nutaat pilersinneqarnerat qanorpiaq ingerlanneqassanersoq ikaarsaariarnermi ataatsimiititaliat aamma isummerfigissavaat. Qaammatinut arfineq pingasunut ikaarsaariarnermi ataatsimiititaliat kattunnissamik piareersarfissaannut ingerlatsinissamik pilersaarusiortoqassaaq, taamaalilluni kommunit nutaat 1. januar 2018-imiit ingerlasinnaalerlutik.

§ 10-mut

Imm. 1-imut

Kommuninut nutaanut aqutsinermi malitassanik kiisalu ikaarsaariarnermi ataatsimiititaliat sulineranni suleriaasissamik ikaarsaariarnermi ataatsimiititaliat aalajangersaassapput. Ikaarsaariarnermi ataatsimiititaliat suleriaasiat kommunit avinneqarnerisa kingorna kommunalbestyrelsissat sulinerannut naleqqussarneqassaaq. Tamanna pillugu kommunit aqunneqarnerat pillugu Inatsisartut inatsisaanni aalajangersakkat taamatuttaaq atuutissapput.

Imm. 2-mut

Siunnersuutigineqarpoq ikaarsaariarnermi ataatsimiititaliat kommunalbestyrelsit atuuttut tunngavigisaasa assingi malillugit kiisalu kommunit aqunneqarnerat pillugu Inatsisartut inatsisaanni tamanna pillugu aalajangersakkat naapertorlugit aningaasaqarnermut ataatsimiititaliamik pilersitsissasut aamma ataatsimiititalianik allanik pilersitsisinnaasut. Siunertaavoq ataatsimiititaliat taakku 1. januar 2018 kingorna ingerlaqqissasut.

§ 11-mut

Imm. 1-imut.

Pisortat suliaasaannik kommuninut suliaasangortinneqartunik kommunit nutaat suliaqarsinnaangortillugit ikaarsaariarnermi ataatsimiititaliat pisariaqartunik aalajangiinissaannik aalajangersakkami pisussaaffilerneqarput.

Imm. 2-mut

Kalaallit Nunaata nunat immikkoortuinut kommuninullu aggornera pillugu Inatsisartut inatsisaata atuuttup allannguutissaanik saqqummiinissaq eqqarsaatigalugu, kommunip nutaap aqqa ilisarnaataalu ikaarsaariarnermut ataatsimiititaliat piaartumik isummerfigissavaat. Atissanik ilisarnaatissanillu ikaarsaariarnermi ataatsimiititaliat tamarmik immikkut Naalackersuisunut inassuteqassapput, taakkulu Kalaallit Nunaata aggornera pillugu inatsisissatut siunnersuut saqqummiutissavaat, tassani kommunit aqqi ilisarnaataallu aalajangersarneqarlutik. Taamaammat ulloq 1. august 2017-imut piffissaliisoqarpoq, taamaalilluni inatsisissatut siunnersuut 2017-imi ukiakkut ataatsimiinnermi Inatsisartunit suliarineqarsinnaaniassammat.

Illoqarfiup ilisarnaataanik aalajangiinnermi ilisarnaatit pillugit malittarisassat isiginiarneqassapput.

§ 12-mut

Imm. 1-imut

Kommunini nutaani kommunit allaffii sumut inissinneqassanersut ikaarsaariarnermi ataatsimiititaliat isummerfigissavaat, soorlu aamma ingerlatsiviit tamarmik kommunit allaffianni inissinneqassanersut imaluunniit ingerlatsiviit ataasiakkaat kommunini nutaani

sumiiffinni allani inissinneqarnissaat naleqqunnerunersoq ikaarsaariarnermi ataatsimiititaliat isummerfigissagaat.

imm. 2-mut

Kommunini nutaani allaffeqarfiit 1. januar 2018-imiit ingerlatsilersinnaaniassammata, kommunini nutaani allaffeqarfiit qanoq Imm. 2-mut aqqissuussaassanersut ikaarsaariarnermut ataatsimiititaliat isummerfigissavaat kiisalu allaffeqarfiup ineriartortinnissaanut allaffissornermi aqutsisut pisariaqartumik amerlassusillit atorfinitsissallugit.

Imm. 3-mut

Kommunip avinneqarnerata piviusunngunnginnerani ikaarsaariarnermi ataatsimiititaliap sulineq naammassereersimassavaat, taamaammallu allaffeqarfiup sumi inissinneqarnissaa allaffissornermilu aqutsisunik atorfinitsitsineq kingusinnerpaamik 31. december 2017 aalajangiiffigineqareersimassallutik.

§ 13-imut

Imm. 1-imut

Tjenestemand-it ullumikkut Qaasuitsup Kommuniani atorfeqartut kommuninilu nutaani atorfinitsinneqarsinnaasut atugassarisaat aalajangersakkami malittarisassiuunneqarput.

Aalajangersakkap kinguneraa atorfinitsitsisartut tassaasut kommunimi nutaami kommunalbestyrelsi, sumiiffillu atorfinitsinneqarfik tassaasoq kommuni nutaaq. Kommunimi nutaami atorfeqalernerq nammineq nuutsitsinerunngilaq. Tjenestemand-it pineqartut taamaalillutik kommunimi nutaami atorfeqalernerup kinguneranik atorfeqarunnaarnissap tungaanut akissarsiaqarlutik/utaqqinnermi akissarsiaqarlutik soraarsinneqarnissaminnik piunasaqarsinnaanngillat.

Aammattaaq tjenestemand-it pineqartut atorfinitsinneqarfimmi nutaami sulinerup allanngorfiginngisaani allamik naleqquttumik atorfeqalersinnaanermut pisussaaffilerneqarsinnaanerannik aalajangersagaq kinguneqarpoq. Atorfiup allap taamaattup naleqquttut isigineqarsinnaaneranik nalilersuinerup saniatigut, atorfiup suuneranik maannamullu atorfigisamut atatinneqarsinnaaneranik nalilersuinerup saniatigut, tjenestemand-ip ilinniagaqarnera, ukioqassusia, peqqissusia, nunami sumi najugaqarnera, inissisimaffeqarnermik nalinginnaasumik isummertarneq il.il. tunngavigalugit nalileereernikkut atorfimmuut naleqquttumut innersuunneqartutut oqaatigineqarsinnaanersoq nalilersorneqassaaq. Nalilersuinermi aamma ilaatigut ilaassaaq, atorfeqarfigisamik allannguneq kommunip avinneqarneranut atatillugu pinersoq. Tamanna isumaqarpoq tjenestemand-it pineqartut maannamut atorfeqarfigisap sinaakkutaasa iluanni

atorfigilernissaanik pisussaaffiliissutaasinnaangitsumi atorfiup nutaap naleqquttup atorfigilernissaanut pisussaaffilerneqarsinnaasoq.

Imm. 2-mut

Isumaqatigiissutit tunngavigalugit atorfillit immikkullu isumaqatigiissuteqarluni atorfillit tamarmik inatsisitigut assigiimmik tunngaveqarnissaat aalajangersakkami qulakkeerpeqassaaq, taamaalilluni atorfeqarneq atugassaritinneqartut allanngortinnagit ingerlaannarsinnaalluni.

Piffissami tunniussiffiusumi pisinnaatitaaffiit pisussaaffiilu kommunit nutaat taamaalillutik malissavaat.

Aalajangersakkap kinguneraa atorfeqartoq kommunip avinneqarnerata kingorna atorfeqartitsisumi nutaami atorfeqarnermi sulineq pillugu isumaqatigiissutit malinnissaannut aallaaviusumik pisussaaffeqartoq.

Aalajangersakkap taamaalilluni kinguneraa, atorfeqartup kommunip avinneqarnerata ilaatut atorfeqartitsisumut nutaamut nuunnermut atatillugu sulisitsisup allanngornera atorfeqartup tungaanit sulineq pillugu isumaqatigiissutit atorunnaarsinneqarnissaannik tunngaviliisinnaasumik atorfeqarneq nammineq annertuumik allannguuteqanngitsaq, allannguinerullunili atorfeqartup naammagiinnartariaqagaa. Kisiannili atorfeqarnermi annertuunik allanik allannguisoqanngippat nunami sumi najugaqarneq isiginiarneqassaaq. Atorfeqartorli atorfeqartitsisumut nutaamut nuunneqarnissamik kissaateqanngippat siumut nalunaaruteqartarnerit nalinginnaasut malillugit atorfimminit soraarniuteqarsinnaavoq.

§ 14-imut

Imm. 1-imut.

Aalajangersakkami ikaarsaariarnermi ataatsimiititaliap ingerlatsinermi aningaasartuutaat malittarisassiorneqarput. Siunnersuutigineqarpoq ikaarsaariarnermi ataatsimiititaliat ataasiakkaat ingerlatsinermi aningaasartuutaat Qaasuitsup Kommunianit akilerneqassasut. Ingerlatsinermit aningaasartuutit tassaasinnaapput ataatsimiinnernut aningaasartuutit, angalanermut aningaasartuutit, kommunit nutaat pilersinnerannut atatillugu siunnersortit avataaneersut ikiuunnerannut aningaasartuutit il.il.

Imm. 2-mut

Tassunga tunngatillugu siunnersuutigineqarportaaq ikaarsaariarnermi ataatsimiititaliat ingerlatsinermit aningaasartuutissaasa Qaasuitsup Kommunianillu akilerneqartussat Naalackersuisunit nalunaarummik suliaqartoqarneratigut tapiissutit annertussusissaasa naatsorsorneqartarnissaat aningaasartuuteqarsinnaanerlu eqqarsaatigalugit Naalackersuisunit maleruagassiornikkut aalajangersarneqarsinnaassasut.

Imm. 3-mut

Ikaarsaariarnermi ataatsimiititaliat ataasiakkaat piffissami ikaarsaariarfiusumi allaffissornikkut pisariaqartumik ikiorneqarnissaat qulakkeerniarlugu siunnersuutigineqarpoq Qaasuitsup Kommunia ikaarsaariarnermi ataatsimiititalianut ataasiakkaanut akeqanngitsumik allaffissornikkut ikiuissasoq. Kommunip avinneqarnissaata piareersarneranut atatillugu allaffissornikkut ikiorneqarnissamik qanoq annertutigisumik pisariaqartitsisoqarnersoq ikaarsaariarnermi ataatsimiititaliat namminneq Qaasuitsup Kommuniani maannakkut kommunalbestyrelsiusoq isumasioqatigalugu nalilersussavaat.

§ 15-imut

Imm. 1-imut.

Ikaarsaariarnermi ataatsimiititaliat siulittaasui ikaarsaariarnermi sulinissaannut missingersuutitut siunnersuut kingusinnerpaamik 1. juli 2017 suliarereersimassavaat. Missingersuutitut siunnersuummi taamaallaat ikaarsaariarnermi ataatsimiititaliat kattunnissap tungaanut sulinissaat missingersuusiorfigineqassaaq.

Imm. 2-mut

Ikaarsaariarnermi ataatsimiititaliat piffissamut missingersuutaat kingusinnerpaamik ulloq 1. august 2017-imi oqallisigineqassasut akuerineqassasullu aalajangersakkami aalajangersarneqarpoq.

Imm. 3-mut

Missingersuutitut akuerineqareernerisa kingorna missingersuutitut pillugit nassuiaat naatsoq ikaarsaariarnermi ataatsimiititaliat avammut saqqummiutissavaat. Avammut saqqummiussineq akuersinerup kinguninngua pissaaq, naatsorsuutigineqarporlu avammut saqqummiussineq missingersuutitut akuerineqareernerisa kingorna kingusinnerpaamik ullut 14-it qaangiunneranni pissasoq. Missingersuutitut assersuutigalugu kommunit nutaat nittartagaanni avammut saqqummiunneqarsinnaapput imaluunniit sumiiffinni kommunit allaffiini misissorneqarsinnaanngortissallugit. Missingersuutitut aamma Naalakkersuisunut nassiunneqassapput.

§ 16-imut

Imm. 1-imut

Suliffeqarfiup kukkunersiuisartup suliamik paasisimasaqartup sorliup ikaarsaariarnermi ataatsimiititaliap 2017-imut naatsorsuutitut kukkunersiussanera ikaarsaariarnermi ataatsimiititaliap kingusinnerpaamik 1. august 2017 aalajangissavaa. Kommunit aqunneqarnerat pillugu Inatsisartut inatsisaanni aalajangersakkat naapertorlugit naatsorsuutitut kukkunersiorneqassapput.

Imm. 2-mut

Kommunini nutaani Aningaasaqarnermut Ataatsimiititaliat kommunalbestyrelsimut naatsorsuutiniq saqqummiisassapput. Naatsorsuutit suliffeqarfimmut kukkunersiuisartumut toqqarneqartumut kingusinnerpaamik 1. juni 2018 tunniunneqartussanngorlugit saqqummiunneqassapput.

§ 17-imut

Imm. 1-imut.

Siunnersuutigineqarpoq ikaarsaariarnermi ataatsimiititaliat kommuniminni nutaami 2018-imiit atuuttussamik missingersuutiniq siullernik suliaqassasut. Kommunit missingersuutaasa suliarineqartarnerat pillugu kommunit aqunneqarnerat pillugu Inatsisartut inatsisaanni aalajangersakkat ikaarsaariarnermi ataatsimiititalianut taamatutaaq atuutissapput.

Imm. 2-mut

Ingerlatsiviit tamaasa ikaarsaariarnermi ataatsimiititaliat misissussavaat, misissuinerlu taanna aallaavigalugu kommunit nutaat ingerlatsinissaasa qaffasissusissaa pillugu siunissami pingaarnertut politikikkissannik suliaqassallutik. Ikaarsaariarnermi ataatsimiititaliat misissuineq aallaavigalugu missingersuusiornermut atatillugu kommunimi nutaami akileraarutit annertussusissaannik kiffartuussinerillu akiinik aalajangiissapput.

§ 18-imut

Imm. 1-imut.

Kommunit nutaat taakku pitsaanerpaanik aallaaveqarnissaat qulakkeerniarlugu, piffissami kattuffiusumi Qaasuitsup Kommuniata piffissami ikaarsaariarfimmi pisariaqanngitsumik immikkut annertuunik aningaasaateqalersinnginnissaa pingaaruteqarpoq. Taamaattumik kommunimi aningaasaqarnikkut ineriartorneq pillugu, tassunga ilanngullugit 2017-imut ilassutitut aningaasaliissuteqarnerit, ikaarsaariarnermi ataatsimiititaliat taakku marluk ingerlaavartumik ilisimatitsisarnissaanik Qaasuitsup Kommuniata kommunalbestyrelsia peqquneqassasoq siunnersuutigineqarpoq.

Imm. 2-mut

Siunnersuutigineqarpoq piffissami ikaarsaarfiusumi Qaasuitsup Kommuniata aningaasaqarnikkut iliuseqarnissaa pillugu malittarisassanik erseqqinnerusuni aalajangersaanissamut Naalakkersuisut piginnaatinneqassasut.

§ 19-imut

Imm. 1-imut.

Kommunini nutaani kommunalbestyrelsit Qaasuitsup Kommuniata pisinnaatitaaffiinik pisussaaffiinillu, tassunga ilanngullugit pigisat nalillit akiitsullu, ulloq 1. januar 2018 tigusissasut aalajangersakkami aalajangersarneqarpoq. Aalajangersakkap ilaatigut kinguneraa illunik pigisanillu nalilinnik allanik Qaasuitsup Kommunianit maannamut pigisaannik kommunit nutaat piginnittuulissasut, soorlu aamma kommunillu nutaat taarsigassarsianut akiligassanillu tunngatillugu akiitsortitit inissisimalissasut, tassunga ilanngullugit Qaasuitsup Kommuniani kommunalbestyrelsit qularnaveeqqusiinermi pisussaaffii. Aalajangersagaq taamaalilluni kinguneqarpoq Qaasuitsup kommuniata akiligassaqaarfiisa akiitsortuusut nikinneri pissutigiiinnarlugu akiligassat pineqartut ingerlaannaq akilersinniarsinnaangikkaat. Aalajangersagaq aammattaaq kinguneqarpoq, kommunalbestyrelsit nutaat oqartussanik namminersortunillu kommunalbestyrelsiusimasut suleqateqarnerannik ataatsimut isigalugu ingerlatsilissasut.

Imm. 2-mut

Siunnersuutigineqarpoq Qaasuitsup Kommunia pisussaaffilerneqassasoq 1. juni 2017 nallertinnagu kommunip, atsiukkamik isumaqatigiissutaanik, isumaqatigiissutaanik, pisussaaffinnik illikartinneqarsimasunik pisussaaffiujunnartunillu misissuissasoq taakkulu ikaarsaariarnermut ataatsimiititalianut saqqummiutissagai. Qaasuitsup Kommunia sinnerlugu atsiornikkut isumaqatigiissutit il.il. kommunalbestyrelsimit isumaqatigiissusiarineqarsimasut pisinnaatitaaffiit pisussaaffiillu ilanngullugit kommuninit nutaanit tiguneqassapput, tak. imm. 1.

imm. 3-mut

Kommunit nutaat taakku marluk akornanni Qaasuitsup Kommuniani pigisanik nalilinnik akiitsunillu agguaaneq kiisalu pigisanik nalilinnik akiitsunillu naatsorsuineq pillugu Naalakkersuisut erseqqinnerusumik malittarisassiornissaannut aalajangersagaq piginnaatitsivoq. Pigisat nalillit akiitsullu assigiimmik agguaanniarneqartarnissaat anguniartariaqarpoq taamaalilluni kommunit nutaat aappaa pilliutigalugu aappaa iluaquserneqassanngimmat. Kiisalu Naalakkersuisut aaqqiagiinnginnernut aaqqiissutissat pillugit aalajangersakkanik aalajangersaasinnaassapput.

§ 20-mut

Imm. 1-imut

2017-imut naatsorsuutit Qaasuitsup Kommuniata suliarisassai aalajangersakkami pineqarput. Aalajangersarneqarpoq 2017-imut naatsorsuutit kommunit aqunneqarnerat pillugu Inatsisartut inatsisaanni tamanna pillugu aalajangersakkat naapertorlugit saqqummiunneqassasut. Kommunini aqutsineq pillugu Inatsisartut inatsisaat naatsorsuutininik saqqummiussineq pillugu aalajangersakkanik atuuttunik imaqarpoq, taakkuli qularnanngitsumik Kommunit pillugit aamma Namminersorlutik Oqartussat missingersuutaat naatsorsuutaallu pillugit Inatsisartut

inatsisissaattut siunnersuummi maannakkut pigineqartumi atorunnaarsinneqassallutik aamma aalajangersakkanik taarserneqassallutik.

Imm. 2-mut

2017-imut naatsorsuutit Qaasuitsup Kommuniata siusinnerusukkat atorsimasaanit kukkunersiuisartumit kukkunersiorneqassasut aalajangersarneqarpoq, tassa kukkunersiuneq kommunit avinneqarnerisa kingorna ingerlanneqartussaammat.

Imm. 3-mut

2017-imut naatsorsuutit kommunip avinneqarnerata kingorna saqqummiunneqassapput, taamaattumillu siunnersuutigineqarpoq naatsorsuutit saqqummiunneqarnissaannut erseqqinnerusunik malittarisassaliornissamut Naalakkersuisut pisinnaatinneqassasut.

§ 21-mut

Suliffiup iluani sulinermi allagaatit, taamaallaat annertunersaalluunniit suliffiup iluani ingerlatsinermi oqartussat suliffiup iluani isumaliutigisaannik imaqartut takutitsisulluunniit, pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq aamma pisortat ingerlatsineranni suliasat suliarineqartarnerat pillugu Inatsisartut inatsisaat nr. 8, 13. juni 1994-imeersoq malillugit, allagaatinik takunnissinnaatitaanermut aallaaviusumik ilaangillat. Suliffiulli iluani sulinermi allagaatit uppersaatit oqartussanut allanut nassiunneqarpata allatulluunniit avataaneersunut tunniunneqarpata suliffiup iluani atugassaanerat atorunnaassaaq.

Kattunnerup eqaatsumik piareersarnissaa eqqarsaatigalugu siunnersuutigineqarpoq, allagaatit uppersaatit kattunnissamik ikaarsaariarnermi ataatsimiititaliat piareersaanerannut atatillugit ikaarsaariarnermut ataatsimiititaliamit Qaasuitsup Kommunianit kattuttunit tigueqartut, suliffiup iluani atugassaanerat atorunnaassanngitsoq. Aalajangersakkap taamaalilluni kinguneraa pisortat ingerlatsinerat pillugu paasitinneqarsinnaatitaaneq pillugu inatsimmi aamma pisortat ingerlatsineranni suliasat suliarineqartarnerat pillugu inatsisimmi allagaatinik takunnittussaataitanermut aalajangersakkat saneqqunneqassasut. Suliffiulli iluni allagaatit allagaatinik takunnissinnaaneq pillugu malittarisassanut nalinginnaasunut ilaassapput, taakku oqartussanut allanut nassiunneqarpata imaluunniit allatigut avataaniittunut tunniunneqarpata.

§ 22-mut

Imm. 1-imut

Siunnersuutigineqarpoq maannakkut Qaasuitsup Kommuniani borgmester-i, borgmester-ip tullia aamma borgmester-ip tulliata aappaa tamanna pillugu malittarisassat naapertorlugit piffissami 1. maj 2017 – 31. december 2017 akissarsiaqassasut.

Imm. 2-mut

Siunnersuutigineqarpoq, Qaasuitsup Kommunianut borgmester-i, taanna aamma ikaarsaariarnermi ataatsimiititaliamut siulittaasutut toqqarneqarsimappat, marloriaammik aningaasarsianik pissarsissanngitsoq. Tamanna tunngaveqartinneqarpoq, borgmesteritut atuuffik tamanna naapertorlugu tamakkiisumik suliffittut aningaasarsiaqartitaanera.

Imm. 3-mut

Taamatuttaaq siunnersuutigineqarpoq Qaasuitsup Kommuniani kommunalbestyrelsimi ilaasortat kommunalbestyrelsimut ilaasortat akissarsiaat pillugit malittarisassat atuuttut malillugit piffissami 1. maj 2017-imiit ulloq 31. december 2017-imut akissarsiaqassasut.

§ 23-mut

Siunnersuutigineqarpoq inatsisartut inatsisaat ulloq 1. januar 2017-imi atulersinneqassasooq.